

DOMINGU XXVI TEMPU KOMÚN – TINAN C

Tema

Liturjia domingu ne'e nian propoin mai ita, dala ida tan, reflesaun kona-ba ita-nia relasaun ho soin sira mundu ne'e nian... Nia konvida ita atu haree sira, la'ós nu'udar buat ruma ne'ebé pertense mai ita ho modu eskuzivu, maibé nu'udar don sira ne'ebé Maromak tau iha ita-nia liman, atu ita administra no fahe, ho gratuidade no domin.

Iha *primeira leitura*, profeta Amós denuncia ho forsa klase dirijente ida ne'ebé moris iha luxu no halo esplorasau ba ema-kiak sira no la preokupa liu ho ema ki'ik sira nia mizéria. Profeta haklaken katak Maromak sei la taka matan ba situasaun ida-ne'e, basá sistema egoíзму no injustisa nian la la'o ho projetu ne'ebé Maromak mehi ba ema sira no ba mundu.

Evanjellu apresenta mai ita, liuhusi ai-kanoik ema riku no ema kiak naran Lázaro, katekeze ida kona-ba posesu rikusoim sira... Iha Lucas nia perspetiva, rikusoim mak nafatin salan ida, basá supoin apropiasaun, ba benefísisu rasik, don sira ne'ebé Maromak destina ba ema hotu... Tanba ne'e ema riku hetan kondensau no Lázaro hetan rekompensa.

Segunda leitura la apresenta relasaun direta ho tema domingu ne'e nian... Nia trasa perfíl “Maromak nia emar” nian: nia ténkeser ema ida ne'ebé hadomi nia maun-alin sira, iha pasiénsia, ne'ebé laran-maus, justu no hatutan ho fidelidade Jezús nia proposta. Ita bele mós hatutan katak nia la moris ba an rasik, maibé fahe ho ema seluk nia an rasik no nia soin sira?

LEITURA I – Am 6,1a.4-7

Ita kontinua ho Amós, profeta husi Técuá, ne'ebé ita hasoru ona domingu kotuk, “profeta jsutisa sosiál nian”.

Testu ne'ebé ohin propoin mai ita pertense ba jéneru literáriu “malisan” nian (kf. vers. 1). Hahú ho interjeisau (“hwy”) ne'ebé baibain uza iha lamentasaun ba ema ne'ebé mate... Liafuan ne'e korresponde ho hakilar bainhira ema akompañia mate ba hakoi... Baibain profeta sira uza liafuan ne'e nu'udar introdusaun ba anúnsiu kastigu nian: nia fó sai katak ema ruma eh grupu ruma iha ona mate nia odamatan tanba sira-nia salan sira.

MENSAJEN

Sé mak destinatáriu mensajen Amós propoin iha testu ne'e? Sé mak ema sira ne'ebé iha ona mate nia odamatan tanba sira-nia salan sira?

Sira ne'e mak klase dirijente, baruk-teen no nakonu ho soin, moris hakmatek iha palásiu sira kapitál nian, moris luxu, nafatin iha festa; sira mak parazita sira ne'ebé toba iha “kama halo ho marfín”, han hahán di'ak, hemu tua spesiál no demais, uza mina-morin importadu, haksolok ho múzika no hananu. Buat grave liu (testu la dehan direktamente, maibé bele haree nia ideia iha Amós nia denúnsia) mak luxu no goza ho buat oioin ne'e mai husi kiak sira nia esplorasau no husi na'ok no prepoténsia hasoru ema fraku sira, ema no baruk-teen, moris iha egoíзму no la preokupa liu ho maun-alin sira nia moris kiak no terus. Ema kiak sira serbisu todan, iha ezisténsia nakonu ho terus, serbisu todan no mizéria, atu bele sustenta klase dirijente nia baruk-teen no luxu. Maromak bele aseita atu situasaun ne'e hanaruk no la para? Maromak la dispostu atu habelun ho situasaun ida-ne'e. Klase dominante Samaria nian ba kontra ukun-fuan “aliança” nian no Maromak la aseita atu taka matan ba ema sira ne'ebé moris di'ak tanba ema kiak sira nia raan no matan-been. Tanba ne'e mak kastigu sei to'o ho

forma ezíliu nian iha rai estranjeiru ida (profeta refere ba Samaria ne'ebé monu iha ema Asíria nia liman iha Salamanasar V nia ukun, iha tinan 721 mK, no klase dirijente nia deportasaun ba Asíria).

LEITURA II – 1 Tim 6,11-16

Ita kontinua reflète Surat Dahuluk ba Timóteo. Timóteo mak ema sarani husi Listra, aman ema-gregu no inan ema judeu-sarani. Nia akompañia Paulo iha nia viajen misionária sira no konfia ba nia koordenasaun pastorál Kreda sira Ázia nian no, tuir tradisaun, nia mak bispu dahuluk Igreja Éfeso nian. Autór surat nian fó sai karakterístika sira kona-ba “Maromak nia emar ida”.

Nia kontestu karik iha inísiu sékulu II mK, iha tempu erezia nian – hanaran gnóstiku – ne'ebé inkomoda ema sarani sira. Tempu ne'e ema sarani sira sofre influénsia husi “mestre falsu sira”, ne'ebé habelar doutrina laloos. Iha ambiente ida-ne'e mak importante liu subliña karakterístika sira eskolante loos nian, liuhusi ema ne'ebé tranzmite fiar.

MENSAJEN

“Maromak nia emar loos” (ne'ebé Timóteo tenke reprezenta) tenke distinge husi moris santu, ho abut iha fiar no iha domin ba maun-alin sira. Iha konkretu, “Maromak nia emar” tenke kuda justisa, piedade, fiar, domin, perseveransa, dosilidade. Nia tenke iha pasiénsia, laran-maus, iha difikuldade sira mai husi servsiu apostóliku. Nia tenke rai “Na'i nia ukun-fuan” – katak lialoos fiar nian ne'ebé tradisaun apostólika tranzmite. Perfíl “Maromak nia emar nian” mak domin ba maun-alin sira, entuziazmu iha ministériu no kapasidade atu haklaken lialoos doutrina nian, simu husi apóstolu sira.

Testu remata ho knananuk/inu litúrjiku ida, ne'ebé apresenta Maromak nu'udar Na'i boot liu hotu, ukun-na'in mesak ne'ebé iha imortalidade, glória no poder universál.

EVANJELLU – Lc 16,19-31

Leitura ohin nian apresenta dala ida tan etapa “dalan Jerusalém nian”. Istória ema riku no ema kiak Lázaro mak testu ida Lucas nian mesak. Ne'e mak katekeze ida ne'ebé aborda problema relasaun entre ema no soin sira mundu ne'e nian. Jezús diriye ba farizeu sira (kf. Lc 16,14), nu'udar representante ema sira hotu ne'ebé hadomi osan no moris ba osan.

MENSAJEN

Ai-kanoik iha parte rua.

Parte dahuluk (vers. 19-26), Lucas apresenta personajen fundamentál rua istória nian: ida riku no moris ho luxu no halo festa boboot no ida fali kiak, hamlaha, moris susar no moras. Sira rua nia mate muda situasaun ho modu radikál.

Kona-ba ema riku hateten de'it katak nia hatais di'ak no halo festa han-hemu bara-barak. Evanjellu la dehan se nia ema aat eh ema di'ak, se nia bá templu eh lae, se nia esplora ema kiak eh la hanoin ba ema kiak sira nia terus; dehan de'it katak bainhira nia mate, nia bá fatin terus nian. Kona-ba Lázaro ne'ebé kiak, dehan de'it katak nia latan iha ema riku nia odamatan, nakonu ho kanek, no hakarak han husi hahán nia rahun monu husi ema riku nia meza no asu sira mai lambe nia kanek sira; bainhira nia mate, anju sira lori Lázaro iha Abraaun nia hiti (katak iha fatin onra nian ho festa ne'ebé Abraaun mak prezide. Ne'e mak

“han-hemu Reinu nian”, iha ne’ebé ema eleitu sira sei hamutuk ho patriarka no profeta sira; testu la dehan se Lázaro hatudu moris ezemplár eh se nia halo hahalok aat, se nia sai modelu virtude nian eh se nia ema ida nakonu ho defeitu sira, se serbisu todan eh se nia parazita ida ne’ebé la halo buat ida atu muda ninia situasaun susar nian...

Iha istória ne’e, parese katak la’ós hahalok di’ak eh aat ema halo iha mundu ne’e mak deside ema nia sorte iha mundu seluk. Entaun tan sá mak ida hetan terus no ida fali ba iha “festa Reinu nian”?

Resposta ida de’it: buat ne’ebé determina diferença destinu nian mak rikeza no pobreza. Ema riku koñese nia terus tanba nia riku; ema kiak koñese “festa Reinu nian” tanba nia ema kiak. Maibé, rikusoin mak salan ida? Sira ne’ebé akumula soin hodi la na’ok ema ida sira iha kulpa ruma? Sai riku hanesan ho sai aat no nune’e, nia destinu mak terus?

Iha Lucas nia perspetiva, rikusoin – lejítima eh ilejítima – nafatin iha kulpa. Soin sira la pertense ba ema ida ho modu partikulár (lae mós ba sira ne’ebé serbisu maka’as atu bele sai na’in ba soin sira Maromak tau iha mundu); maibé sira mak Maromak nia don, ba nia oan sira, atu fahe no asegura moris ho dignidade ba ema hotu... Sé mak sai na’in – maski ho modu lejítimu – ba soin sira-ne’e, hodi la partilla, nia na’ok Maromak nia projetu. Sé mak uza soin sira mundu nian atu iha moris luxu hodi haluha ema seluk nia nesesidade, nia na’ok nia maun-alin sira ne’ebé moris iha mizéria. Iha istória ne’e, Jezús hanorin katak ita la’ós na’in ba soin sira Maromak tau iha ita-nia liman sira, maski ita manán ho forma lejítima: ita administradór de’it, encarregadu atu partilla ho maun-alin sira buat ne’ebé pertense ba ema hotu. Haluha buat ne’e signífika moris ho forma egoísta, nune’e nia destinu mak terus”.

Iha segunda parte testu nian (vers. 27-31), insiste katak iha Eskritura, apresenta dalan seguru atu aprende no asume atitude loos iha relasaun ho soin sira. Ema riku sai di’uk ba Maromak nia Liafuan nia interpelasaun sira (“Moisés no Profeta sira”) no buat ne’e mak deside nia sorte: nia lakohi rona Liafuan no la husik Liafuan nakfilak nia. Versíkulu finál (vers. 31) espresa didi’ak mensajen hetan iha parte daruak testu nian: milagre boot maibé la serve, bainhira ema la simu iha nia fuan Maromak nia Liafuan. Maromak nia Liafuan de’it mak bele korrije ema nia hilin laloos sira, sai husi ninia egoíзму, aprende hadomi no fahe.

Istória ne’ebé propoin mai ita, mak ilustrasaun “rahun-di’ak” sira no malisan sira Lc 6,20-26 nian... Lucas haklaken katak Maromak nia projetu hala’o liuhusi “Reinu” ida fraternidade nian, domin no partilla nian. Ema ne’ebé lakohi projetu ida-ne’e nia hili atu moris taka-an iha ninia egoíзму no auto-sufisiénsia (ema riku sira), la bele halo parte mundu foun fraternidade nian ne’ebé Maromak propoin ba ema sira.